

09/10/1997

Mahathir rasmi Tati di Teluk Kalong Sabtu ini

KUALA TERENGGANU, Rabu - Datuk Seri Dr Mahathir Mohamad akan merasmikan Institut Lanjutan Teknikal Terengganu (Tati) di Teluk Kalong, Kemaman, Sabtu ini.

Pengerusi Jawatankuasa Pembangunan Sains, Teknologi, Sumber Manusia dan Pengajian Tinggi negeri, Datuk Dr Abdul Latif Awang berkata, Perdana Menteri dijangka tiba jam 9.30 pagi dari sini untuk merasmikan institut itu.

"Sebelum itu, Dr Mahathir akan hadir di majlis penutup Tilawah al-Quran Peringkat Kebangsaan di Stadium Sultan Ismail Nasiruddin Shah di sini," katanya.

Dr Abdul Latif berkata, Menteri Pendidikan, Datuk Seri Najib Tun Razak dan Menteri Penerangan Datuk Mohamed Rahmat serta Menteri Besar, Tan Sri Wan Mokhtar Ahmad, dijangka hadir sama di majlis perasmian itu.

Perdana Menteri dijangka melawat Pusat Latihan Keselamatan Terengganu (TSTC) di Kijal, sebelum mengadakan pertemuan dengan Umno Perhubungan Negeri di Awana Kijal, di sini.

Tati sebuah institut berasaskan kejuruteraan teknikal yang menganjurkan kursus jangka pendek dan panjang dengan kerjasama Sekolah Kejuruteraan St Gallen (ISG) Switzerland.

Tati sudah mengeluarkan kumpulan pertama pelajar peringkat diploma bagi jurusan teknologi maklumat, mekatronik, pembuatan dan rekabentuk peralatan dan acuan.

(END)